

AMISTAD

ANNO 2, NO. 11

ARUBA, JULI 1973

Julio Bernardo Euson

**a bolbe triunfa den exterior, hizando asina
number di Aruba.**

Un jui di tera, kizas antes desprecia pa su color, awe ta é orguyo di hopi hende den mundo. Te ainda mi ta convenci ku tin hopi hende aki na Aruba/Antiyas mes ku no ta reconoce su balor. Euson conoci den mundo komo ganador di varios festivalnan mundial di balor, Euson ta halzando nos number, dunando un reconocimiento mundial. Nos tur mester sinti nos orguyoso di su presentacion i acogidanan.

Mi ta sigur ku un i tur ku a lesa e resumen ku Amigoe di Aruba a publika diamars 17 di juli, encuanto e gran triunfo di Euson na Athena, na unda nan a compara su actuacion, ku un actuacion di Louis Armstrong i e alegria cu e pueblo di Grecia a sinti dia guera a termina, a pone nos tur sinti nos mes emociona. Hasta tabata tin komen-

tarionan di varios Arubianonan, ku hasta nan a jora, ora nan a leza e resumen ei. Ta promer jui di tera ku a jega asina lew i ricibi un reconocimiento mundial Nos mester sinti nos orguyoso i emociona, ora bo les só ku 75.000 hende tabata grita nomber di nos isla, i tabata anima nos orguyo Julio Euson.

Julio mester mas aprecio i reconocimiento aki na Aruba, principalmente di nos gobierno. Gobierno mester mandé un telegram di felicitacion i tambe invité pa un bishita especial, na unda nos lo organisa un homenaje grandi na su honor. Julio bo ta nos embajador, orguyo i nos representante den exterior. Ojala un dia bo sali vencedor di e songfestival di San Remo.
